

Inatsisissatut siunnersuummut nassuiaatit

**Nalinginnaasumik nassuiaatit**

1. Aallarniut:

*a) Siunnersuutip siunertaa tunuliaqutaalu*

Namminersorlutik Oqartussat tapiissutit aqqutigalugit naalackersuinikkut suliniaqatigiiffinnut aningaasalersuisarnerannut maleruagassat atuuttut inatsisissatut siunnersuutikkut erseqqissaavigineqarput.

Naalackersuinikkut sulinermit aningaasatigut tapiissuteqartarneq pillugu Inatsisartut inatsisaat siulleg 1995-imi akuersissutigineqarpoq. Taanna tikillugu naalackersuinikkut suliniaqatigiiffinnut tapiissutit aningaasanut inatsimmi sinaakkusiussatut aningaasaliissutit aammalu maleruagassat Inatsisartut immikkut inatsisiliaanni aalajangersarneqartut tunngavigalugit tunniunneqartarsimapput. Tapiissutit ilaat (partiimut ataatsimut 210.000 kr.-it) partiip allattaanut tapiissutit immikkut atugassanngortinneqartarput.

Tapiissuteqartarnermut inatsit atuuttoq 2001-imi akuersissutigineqarpoq, tamatumalu kingorna 2003-mi 2005-imi kiisalu 2006-imi allanngortinneqarluni. Inatsisip kingullermik allanngortinneqarneratigut partiit tamarmik aningaasanik tunngaviusunik ukiumut 300.000 kr.-inik tapiiffigineqartarput, taakkulu saniatigut ilaasortanut ataasiakkaanut naatsorsuullugu 125.000 kr.-it tunniunneqartarlutik.

Tapiissuteqartarnermik inatsisaaqqaartup 1996-imi atuutilerneratigut naalackersuinikkut sulinermit pisortat aningaasatigut tapiissutigisartagaat partiinut tallimanut agguataarlugit (qinersinermut tapiissutit ilanngunnagit) 2,5 mio. kr.-erluinnarnik amerlassuseqarput. Tamatuma kingorna inatsimmik allannguisarnikkut pisortat partiinut tapiissutaat partiinut tallimanut agguataarlugit (qinersinermut tapiissutit ilanngunnagit) ukiumut 5,3 mio. kr.-erluinnarnik amerlassuseqalersimapput. Taamaasillutillu tapiissutit piffissami 1996 – 2009-mi marloriaatit sinnerlugit amerleriarsimapput.

Tamatumalu saniatigut partiinut toqqaannanngikkaluamik (inatsisitigut tunngavissinneqanngitsumik) tapiissutit ilaatigut Inatsisartut allaffeqarfiata

missingersuutai aqputigalugit partiinut siunnersortit aningaasarsiaqartinneqarnerisigut annertuumik annertusaavigineqarsimapput. Toqqaannangikkaluamik tapiissutit ullumikkut ima annertussuseqarlutillu pissuseqarput tapiissuteqartarnermik inatsimmut naapertuuttuunerat nalorninarluni tamatumalu peqatigisaanik naalakkersuinermik suliniaqatigiiffinnut pisortanit tapiissutigineqartartut tamakkiisut pillugit tamat paasisaqarsinnaanerannut akimmisaartitsillutik.

Ilaatigut naalakkersuinnikkut suliniaqatigiiffinnut pisortat tapiissutaannut inatsisitigut killiliussanik aalajangersimasunik pilersitseqqinnissaq ilaatigullu tapiissutit tamat oqartussaaqataaneranni inatsisitigut akuerisaasumik tunniunneqassappata pisariaqartumik pisortat tapiissutaasa ersarissunngorteqqinnissaat inatsisissatut siunnersuutikkut matumuunakkut siunertarineqarpoq.

Toqqaannangikkaluamik tapiissutit Namminersorlutik Oqartussanit tapiissutigineqarsinnaatitaasut allattoqqissaarneqarnerisigut inatsisitigut inissisimaneq erseqqissoq inatsisip allanngortinneqarneratigut pilersinneqarpoq. Tamatuma kingorna inatsisitigut tunngavissinneqarsimanngitsunik toqqaannartumik toqqaannangitsumillu tapiissuteqartoqarsinnaajunnaassaaq.

Taama allanguineq Inatsisartut allaffeqarfiata partiillu soqutigisaanut naapertuuttutut nalilerneqarpoq. Allaffeqarfimmi pisortat nakkutigisinnaanngisaanik allaffeqarfiup sulisuanik aningaasaataanillu partiit allattoqarfiisa siumut naatsorsuutigineqariinngitsumik atuisinnaanerannik aarleqquteqarunnaarneq pissutigalugu allaffeqarfiup missingersuutaanik Inatsisartut allaffeqarfiat kukkunersiuisullu aqutsisinnaanerat nakkutilliisinnaanerallu siunissami pisariinnerulissaaq. Illuatungaatigullu akiliuteqarnatik sullississutinik atortunillu sorlernik atuisinnaanertik pillugu partiit ersarissunik malittarisassaqaalissapput, soorlutaaq partiit aningaasaqarnikkut aaqqissuussisinnaanikkullu kiffaangissuseqarnerat siunnersuutikkut isiginiarneqartoq.

*b) Partiit allaffeqarfiinut ullumikkut toqqaannangikkaluamik tapiissutaasartut*

Taaneqareersutut Inatsisartut allaffeqarfiannut missingersuutit aqputigalugit partiinut siunnersortit ukiuni kingullerni aningaasarsiaqartinneqartarsimapput. Taamaalillutillu partiinut siunnersortit Inatsisartut allaffeqarfiannit atorfeqartitaasarsimapput, tassanngaanniilli ilitserorneqarsinnaatitaanatik. Taama ilusiliisimaneq tapiissuteqartarnermik inatsimmik sanioqqutsinerusoq soorlutaaq atorfinitsitsisarnermi maleruagassat eqqarsaatigalugit ersarissumik ajornartorsiutitaqartoq nassuerutigineqartariaqarpoq.

Aamma allatigut partiit allattoqarfiisa aningaasaqarnerat Inatsisartullu missingersuutaat tamakkiisumik ullumikkut immikkoortinneqarsimanngillat. Allaffissornikkut aningaasartuutit ataasiakkaat partiit gruppiinut toqqaannartumik attuumassuteqartut Inatsisartunut missingersuutit aqputigalugit akilerneqartarput.

Assersuutigalugu aalajangiiffigisassatut siunnersuutit aammalu oqaaseqartartut oqaaseqaatissaasa nutserneqarnerannut partiit aningaasartuutaat Inatsisartut allaffeqarfiannit akilerneqartarput. Akileeqqusissutit fakturat nassiunneqartut eqqortuunersut imaluunniit akissarsiassatut akileeqqusissutit sullississutigineqartunut naapertuunersut Inatsisartut naatsorsuuseriviata nalilissallugit periarfissaqarfiginngilaa. Tamanna partiimit pineqartumit taamaallaat misissorneqarsinnaavoq, aningaasartuulli partiimit nammineq akilerneqartussaannngilaq, taamaattumillu taamatut misissuinissaminut immikkut tunngavissaqartutut kajumissuseqartutulluunniit partii misigisimassanani. Taamatuttaaq akinik qaffasinnerusunik (nukinginnartunik suliaqarnermi akigitinneqartartunik) akiliuteqartoqaqqunagu atortussanik nutserneqartussanik siusissukkut nassiussinissamut taama aqqissuussisimanikkut partiit kajumissuseqalersinneqarneq ajorput.

Aammattaq partiit allatseqarfiisa allaffissornikkut ingerlatsinerisa annertunerpaartaa Inatsisartut allaffeqarfiata missingersuutai aqqutigalugit ullumikkut aningaasalersorneqarpoq.

## 2. Siunnersuummi immikkoortut pingaarnert:

Aningaasat partiinut naalackersuinermik suliaqartunut Inatsisartullu allaffeqarfiannut Nunatta Karsianit atugassiissutigineqartut immikkoorluinnartuunerata siunissami ersarissuullunilu nassuiarluagaanissaa siunnersuutip siunertaraa.

Partiinut toqqaannartumik toqqaannangikkaluamillu tapiissuteqassagaanni tamatuma inatsisitigut ersarissumik tunngavissinneqarsimasariaqarnera aammalu inatsisitigut tunngavissaq pisariaqartoq pigineqartinnagu Namminersorlutik Oqartussat, tassunga ilanngullugu Inatsisartut allaffeqarfiata taama tapiissuteqarnissamut pisussaatitaannginnerisa erseqqissarneqarneratigut taama immikkoortitsineq inatsisissatut siunnersuutikkut qulakkeerneqassaaq.

Inatsisissatut siunnersuummi killiliineq naapertorlugu sullississutit uku partiinut il.il. siunissami akeqanngitsumik tunniunneqarnissaannut tunngavissaqassanngilaq:

- Nammineq nutserisorisat nutserisulluunniit avataaneersut, siunnersortit aammalu allatsit il.il. aningaasarsiaannut taarsiissutit taakkuninngaluunniit akiliineq kiisalu sulisorisanut ajunngitsorsiassanik qanoq ittuugaluanik, tassungalugu ilanngullugu taakku nerisaqartinneqarnerannut akiliuteqarneq.
- Telefonimik atuineq.
- Allaffimmi atortut elektriskiusut elektroniskiusulluunniit, soorlu inuit ataatsiakkaat printerii, kopimaskinat, telefonit angallattakkat, atortorissaarutit AV-t, qarasaasiaq atorlugu seqersittakkat, scannerit, telefonit ataatsimiissutit, faxit ilaallu ilanngullugit.
- Allaffimmi atortut soorlu printerinut kopeerutinullu pappilissat, printerit qalipaatisartaat, aqerluusat assigisaallu.
- Softwarenik atuisinnaanermut uppernarsaatit, aviisit atuakkallu.

Sullississutit uku Namminersorlutik Oqartussanit akeqanngitsumik suli atugassiissutigineqarsinnaapput:

- Allaffiit ataatsimiittarfiillu Inatsisartunut ilaasortat inatsisartutut sulinerannut atatillugu atorpeqartut, tassunga ilanngullugu allaffeqarnermut atatillugu atortut, soorlu toqqorsiviit mikinerusut, iggaviit mikinerusut, atisaajartarfiit, perusersartarfiit, printeriisiviit il.il.
- Allaffiit imermik, innaallagissamik kiassarnermillu pilersorneqarnerat.
- Allaffiit iluisa silataasalu aserfallatsaalinerat.
- Allaffinnik eqqiaaneq.
- Allaffiit attaveqarnermut atortulersuutaat, soorlu internetsimut aamma telefoninut il.il. ikkuffiit.
- Allaffiit internetikkut attaveqarnerannut ingerlatsineranut aningaasartuutit, taakku aningaasatigut teknikikkullu killissarititaasut erseqqinnerusumik aalajangersarneqartut iluanniippata.
- Qaraasiakkut atortorissaarutinut nalinginnaasunut aalajangersimasunut ikiorteqarneq, taakku Namminersorlutik Oqartussat qarasaasiaqarnikkut attaveqaataannut atanilerneqarsimappata aammalu Namminersorlutik Oqartussat attaveqaqatigiinnermut isumannaallisaneermullu nalinginnaasumik malittarisassaannut sukkulluunniit atuuttunut eqquutsitsippata.

Tunngaviusumik isigalugu allaffimmi nalinginnaasumik pequtit, assilissat, nivinngaaviit, nillartaatsiviit assigisaallu, nerinermit atortut il.il. allaffimmi atortorissaarutit ilaattut akeqanngitsumik atugassiissutigineqarsinnaapput, tamatumani allaffiit, ataatsimiittarfiit atortorissaarutillu allat partiinit siunissami akilerneqartalernissaat pillugu partiit isumaqatigiissuteqarfigineqarnissaat naatsorsuutigineqarpoq.

Tamatuma saniatigut siunnersuutip nassatarisaanik aningaasartuutaanerussutissanut taarsiutissanik partiinut tapiissutit qaffanneqarnissaannik inatsisissatut siunnersuut ilaqartinneqarpoq. Taakku naatsorsorneqarneranni allaffiit, ataatsimiittarfiit assigisaallu pequtsersorneqarnerisa nammineq akisussaaffigineqalernissaat pillugu isumaqatigiissuteqaatissatut naatsorsuutigisaq ilanngullugu eqqumaffigineqarsimavoq.

Aningaasat inatsisissatut siunnersuummi pineqartut Nunatta Karsiata naatsorsuutai aammalu Inatsisartut ukiumoortumik nalunaarusiaat aqqutigalugit tamanit manna tikillugu tamakkiisuunngikkaluamik takuneqarsinnaasimapput. Aningaasat atorpeqarnerannik tamat takunnissinnaanerat tapiissutinik atuineq pillugu naatsorsuutinik nassiunneqartunik Inatsisartut Siulittaasoqarfiata tamanut saqqummiussisarneratigut qulakkeerniarneqarpoq.

3. Kalaallit Nunaanni Namminersorlutik Oqartussanut aningaasaqarnikkut allaffissornikkullu kinguneqaatissat:

### *3.1 Aningaasaqarnikkut kinguneeqaatissat*

Inatsisissatut siunnersuut ataatsimut isigalugu Nunatta Karsianut kinguneeqaateqassanngilaq. Kontomilli pingaarnermut 01.10.10-mit, Inatsisartunut tunngasumit, missingersuutitut aningaasaliissutinit kr. 3.145.000-it kontomut pingaarnermut 01.06.11-imut, Naalackersuinnikkut suliniaqatigiiffinnut aningaasatigut tapiissuteqartarnermut tunngasumut, nuunneqartussaassapput.

Ukiut kingulliit sisamat ingerlaneranni suliassanut inatsisissatut siunnersuummi pineqartunut atatillugu agguaqatigiissillugu aningaasartuutaasarsimasut qanillattorlugit aningaasat naatsorsorneqarsimapput. Inatsisartulli ingerlatsinermut aningaasartuutaasa ikilisarneqarnissaannik Inatsisartut UKA 08-mi aalajangigaata ilanngunneqarnissaa siunertaralugu manna tikillugu aningaasartuutaasartut ilaat, aningaasarsianut attuumassuteqanngitsut, naatsorsuineq sioqqullugu 10 %-imik ikilisinneqarsimapput. Taamaaliornikkut sipaaruteqarnissap Inatsisartunit akuersissutigineqartup naligiimmik agguataarneqarnissaa qulakkeerneqarpoq.

Partiit allaffeqarfianni sulisut, soorlu partiinut siunnersortinik atorfinitsitsineq soraarsitsinerlu kiisalu akissarsianik sulisunillu aqutsineq inatsisissatut siunnersuutip kingunerisaanik partiinut naalackersuinnermik suliaqartunut pissusissaatut sulisitsisunngortussanut nuunneqassapput. Tassunga atatillugu isumaqatigiissutit il.il. pisariaqartut aqqinnissaat partiit namminneq pisussaaffigaat. Partiit allaffeqarfianni sulisunut, tassunga ilanngullugu partiit siunnersortaannut aningaasartuutit tamarmik inatsisip atortuulerneratigut partiinut nuunneqassapput. Tassunga aamma ilaapput sulisooreersut suliunnaarnerannut atatillugu angalanerannut pequtaasalu nuunneqarnerannut aningaasartuutit. Allannguut partiinut aningaasartuutaqqunagu suliassap tamatuma nuunneqarnerani aningaasat partiit allattoqarfiisa manna tikillugu akissarsianut aningaasartuutigisartagaattut annertussuseqartut Inatsisartut kontoannit pingaarnermut partiinut tapiissutinut kontomut pingaarnermut nuunneqassapput. Aningaasanut nuussassanut tamakkiisunut immikkoortumi siuliani allassimasunut aningaasat taakku ilanngunneqarput.

Allaffinni pequtit il.il. allaffinni atortulersuutit ilanngullugit manna tikillugu akeqanngitsumik atugassanngortinneqarsinnaanerat inatsisissatut siunnersuutikkut akimmisaartinneqanngilaq. Allaffiit ataatsimiittarfiillu pequtsersorneqarnerat aammalu atortulersuutit allat partiinit namminernit akilerneqartalertussanngorlugit partiit isumaqatigiissuteqarfigineqarnissaat naatsorsuutigineqarpoq. Pequtit manna tikillugu partiinut atugassiissutigineqartarsimasut Inatsisartut allaffeqarfianni pequtitut nalunaarsorsimaffimmi ilaapput Inatsisartunillu pigineqaannassallutik. Siunissami aserfallatsaaliineq nutaanillu pisineq partiinit nammineq aningaasalersorneqassaaq.

### *3.2 Allaffissornikkut kinguneeqaatissat*

Inatsisartut allaffeqarfiannut partiinut siunnersortit akissarsiaqartinneqarnerannut atorfeqartinneqarnerannullu, partiit nutserisitsinermut aningaasartuutaannut, ingerlatsinermut aningaasartuutininut assersuutigalugu pequtinut, allaffimmi atortunut pigisanullu, IT-mut atortulersuutit il.il. tunngasumik qinnuteqaatinut atatillugu suliassanik ullumikkut ingerlaavartumik isumaginnittartumut allaffissornikkut oqilisaassinermik inatsisissatut siunnersuut nassataqassaaq. Taamatuttaaq partiit allatseqarfiini sulinerup oqileriarneranik inatsisissatut siunnersuut kinguneqassaaq.

Inatsisartuni partiit inissiat normuinik amerlanngitsuinnarnik pisortat inissiaatileqatigiiffiannit ullumikkut atugassinneqarsimapput. Inatsisissatulli siunnersuut akuersissutigineqassappat partiit nammineq sulisorisaat amerlineqassasut naatsorsuutigineqartariaqarpoq. Taamaattumillu pisortat inissiaatileqatigiiffiannik ataatsimik arlalinnilluunniit isumaqatiginninniareernikkut partiit sulisorisaannut inissiat normuinik amerlanerusunik atugassiinissaq pisariaqarsinnaassaaq.

#### 4. Inuussutissarsiornermik ingerlataqartunut aningaasatigut allaffissornikkullu kinguneqaatissat:

Siunnersuut inuussutissarsiornermik ingerlataqartunut kinguneqaateqanngilaq.

#### 5. Avatangiisinut pinngortitamullu kinguneqaatissat:

Siunnersuut avatangiisinut pinngortitamullu kinguneqaateqanngilaq.

#### 6. Innuttaasunut allaffissornikkut kinguneqaatissat:

Siunnersuut innuttaasunut kinguneqaateqanngilaq.

#### 7. Kinguneqaatit annertuut allat:

Siunnersuut annertuunik allanik kinguneqaateqanngilaq.

#### 8. Naalagaaffeqatigiit Namminersorlutillu Oqartussat akornanni pissutsit:

Siunnersuut Naalagaaffeqatigiinnut Namminersorlutillu Oqartussanut kinguneqaateqanngilaq.

#### 9. Oqartussaasut kattuffiillu tusarniaaffigineri:

Siunnersuut innuttaasunut inuussutissarsiornermillu ingerlatsisunut kinguneqaateqanngimmat tusarniaassutigineqanngilaq.

## **Siunnersuummi aalajangersakkanut ataasiakkaanut nassuiaatit**

### *§ 1-imut*

Nr. 1-imut.

*Tapiissuteqartarnermik inatsimmi § 1, imm. 4 pillugu.*

Aalajangersagaq nuttajuvoq aammalu naalackersuinikkut sulinermit aningaasatigut tapiissuteqartarneq pillugu Inatsisartut inatsisaat naapertorlugu Kalaallit Nunaanni Namminersorlutik Oqartussat partiinut, kattusseqatigiinnut kisimiillutillu qinigaasunut aningaasatigut tapiissutigisinnaasaat tamakkiisut tassani erseqqissaatigineqarlutik.

Kalaallit Nunaanni Namminersorlutik Oqartussanik oqarnermi pineqarput Naalackersuisut aammalu Inatsisartut kiisalu taakku allaffeqarfii. Inatsisartut allaffeqarfiata partiillu allatseqarfiisa akornanni killiliinermit erseqqissaaneq taamaallaat sunniteqassaaq, taakkumi toqqaannanngikkaluamik tapiissutitut taaneqarsinnaasunik ullumikkut aningaasartuuteqarfiusarmata.

Aalajangersakkakkut aalajangersarneqarpoq Namminersorlutik Oqartussat toqqaannartumik toqqaannanngikkaluamilluunniit aatsaat tapiissuteqarsinnaasut, tamanna inatsimmi erseqqilluinnartumik tunngavissinneqarsimappat, tassunga ilanngullugit Inatsisartut inatsisaanni aalajangersakkat sinneri kiisalu inatsisit allat, soorlu aningaasarsiaqartitaanermut inatsit. Missingersuutit ileqquliussalluunniit aqutugalugit tunngavissiisoqarsimappat tamanna naammanngilaq.

Aningaasatigut toqqaannartumik tapiissuteqarnerup saniatigut aningaasatigut toqqaannanngikkaluamik iluaqutissinneqarnermut, soorlu pitsaasumik atugassaqartitsilluni taarsigassarsinermit qularnaveeqqusiinermullu kiisalu sullississutinut, pigisanut atuisinnaatitaanernulluunniit akeqanngitsunut imaluunniit akinut akikinaakkanut aalajangersagaq aamma tunngassuteqarpoq. Akerlianilli niuernerme akigitinneqartut atorlugit Inatsisartut allaffeqarfiat aqutugalugu pisiassanik sullissussutinilluunniit partiit pissarsisinnaanerannut aalajangersagaq akimmisaartitsinngilaq.

Assersuutugalugu Inatsisartunut nioqqutinik pilersuisut partiit allattoqarfiannut pappilianik kopeerutinik akuttunngitsumik pilersuisarnissaat isumaqatigiissutigineqarsinnaavoq, tassa taamaaliornermi Inatsisartut aningaasartuutaat partiimit pineqartumit tamakkiisumik matussuserneqarpata.

Aammattaaq assersuutugalugu atortunik elektroniskiusunik allaffeqarfik peqatigalugu ataatsimoorluni pisinermi pisiarineqartut amerlassusiat apeqqutaatillugu

akikilliliissutigineqartut ilaannik partiit pissarsisinnaanerat aalajangersakkamut akerliunngilaq.

Inatsisissatut siunnersuutip nassatarisaanik assersuutigalugu oqaaseqartartut oqaaseqaataannik ilaasortallu siunnersuutaannik nutserisitsineq siunissami partiit namminneq akilertalissavaat. Tamatumani taakku Inatsisartut atugassaattut piffissaq eqqorlugu nutserneqarnissaannut partiit pisussaaffeqarnerat allanngunngilaq.

Ataatsimiititaliat isumaliutissiissutaannik aammalu partiit ikinnerussuteqarlutik oqaaseqaatigiunnagaannik nutserineq Inatsisartut allaffeqarfiannit suli isumagineqartassaaq. Ikinnerussuteqarlunili oqaaseqaatip partiip nammineq nutserisuannit nutserneqassasoq partiimit kissaatigineqarpat, tassunga aningaasartuut partiimit nammineq akilerneqassaaq.

*Tapiissuteqartarnermik inatsimmi § 1, imm. 5 pillugu.*

Aalajangersagaq nutaajuvoq imarivaalu imm. 4-mi ilaatinneqanngitsut, taassumalu kinguneraa Inatsisartunut ilaasortat inatsisartut sulinerannut atatillugu allaffiit aammalu ataatsimiittarfiit assigisaallu Namminersorlutik Oqartussanit akeqanngitsumik atugassiissutigineqarsinnaanerata. Taamaalillunilu Inatsisartunut ilaasortat partiillu allaffeqarfiini sulisut Inatsisartut atortulersuutaannut atatillugu partiit gangiini allaffinnik akiliutitaqanngitsumik atuisinnaanerannik peruserineqartoq attatiinnarneqarsinnaavoq.

“Assigisaallu”-mik oqarnermi pineqarput init ataatsimiittarfiit assigalugit “allaffeqarnermi atortulersuutit”-nut ilaasutut isigineqarsinnaasut. Tamatumani pineqarlutik toqqorsiviit mikinerusut, iggaviit mikinerusut, atisaajartarfiit, perusersartarfiit, printeriisiviit il.il. Tamakku aatsaat atugassanngortinneqarsinnaapput Inatsisartut allaffeqarfiannut taama atugassanngortitsineq immikkut aningaasartuutaanngippat.

Allaffimmi atortulersuutit aalajangersagaq una malillugu atugassanngortinneqartut Inatsisartut ataatsimiinnerannut ataatsimiititaliallu sulinerannut attuumaqqissaanngikkaluamik partiit naalackersuinikkut allanik ingerlatsinerannut killilersugaanngitsumik atorneqarsinnaapput.

Ininik aalajangersimasumik annertussusilinnik, illuutini aalajangersimasuni quleriilluunniit arlaanni aalajangersimasuni Namminersorlutik Oqartussat inatsisitigut pisussaaffigalugu atugassiisussaataitanerannik aalajangersagaq kinguneqanngilaq. Tamatumani inatsisikkut tunngavissaatinneqarpoq manna tikillugu peruserineqarsimasup ingerlaannarsinnaanera aammalu maanna annertussusiusup annertusineqarnissaa aatsaat pisinnaasoq Inatsisartuni pissutsit tamanna tunngavississinnaappassuk, minnerunngitsumik Inatsisartunut ilaasortat naammaginarlutik sullinneqarnerisa ingerlaannarnissaa qulakkeerniarlugu inatsisartutigoortumik sulineq ima annertuseriarsimappat allaffittut atukkat annertusineqartariaqarlutik. Taamatut annertusisitsineq aatsaat pisinnaavoq Naalackersuisut qitiusumik aqutsisoqarfiannik siumoortumik

isumaqatigiissuteqarnikkut, taakkumi allaffinnik atukkaminnik tunniussisariaqassammata.

Allaffiit Inatsisartunit partiinut il.il. atugassiissutigineqartut assigiimmik pinnittussaannermik tunngavik aallaavigalugu ilaasortaqaqqortussuseq naapertorlugu partiinut, kattusseqatigiinnut kisimiillutillu qinigaasunut agguaanneqassapput, tamatumani gruppi mikinerit kisimiillutillu qinigaasut eqqarsaatigalugit minnerpaaffiliinissaq qulakkeerneqarsinnaassalluni.

Allaffinnik ataatsimiittarfinnillu akeqanngitsumik atuinermi manna tikillugu pisarnertut imeq, innaallagialu kiassarnerlu aammalu illup iluanik silataanillu aserfallatsaaliineq ilaatinneqarsinnaapput. Taamatuttaaq allaffinnik eqqiaanermut imaluunniit attaveqarnermi teknikikkut atortulersuutinut internetimut telefonimullu ikkuffinnut aningaasartuutit allaffeqarfimmit naatsorsuusiunneqartariaqanngillat.

Assersuutigalugu allaffimmik atortulersuutinik tamanik atortorissaaruteqartinneqartumik aalajangersimasumik akeqartitsilluni attartornermut isumaqatigiissummi ilaatinneqarsinnaasut iluanni sullississutit ingerlanneqarsinnaappata attaveqaatinik (internet, fastnettelefoni) atuinermi ingerlatsinermit aningaasartuutit allaffinnik aamma ataatsimiittarfinnik assigisaannillu akeqanngitsumik atuinermut ilaatinneqarsinnaapput. Atuineq Namminersorlutik Oqartussat suliassaqarfimmut aningaasartuutaannut annertuumik sunnuteqanngippat piunasaqaat tamanna aallaavigalugu internetimut atanilerneqarneq akeqanngitsumik atugassiissutigineqarsinnaavoq. Fastnetimut telefonit aallaavittut isigalugu akeqanngitsumik sullississutigineqarsinnaasut avataanniippat, atuinermi apeqqutaatillugu akiligassat nalinginnaasumik annertusinnaasarmata.

Inatsisissatut siunnersuut malillugu tunngaviusumik isigalugu allaffimmi nalinginnaasumik pequtit, assilissat, nivinngaaviit, nillartaatsiviit assigisaallu, nerinermit atortut il.il. allaffimmi atortorissaarutit ilaattut akeqanngitsumik atugassiissutigineqarsinnaapput, tamatumani allaffiit, ataatsimiittarfiit atortorissaarutillu allat partiinit siunissami akilerneqartalernissaat pillugu partiit isumaqatigiissuteqarfigineqarnissaat naatsorsuutigineqarpoq.

Taguutip “Allaffiit aamma ataatsimiittarfiit assigisaallu” aallaavittut isigalugu avataanniippat allaffimmi atortut elektriskiusut elektroniskiusulluunniit, soorlu inuit ataatsiakkaat printerii, kopimaskinat inunnit ataasiakkaanit aammalu ataatsimoorussat pigineqartut, qarasaasiat angallattakkat, telefonit angallattakkat, atortorissaarutit AV-t, qarasaasiaq atorlugu seqersittakkat, faxit ilaallu ilanngullugit. Tamanna aamma atuuppoq allaffimmi atortut soorlu printerinut kopeerutinullu pappilissat, printerit qalipaatisartaat, aqerluusat assigisaallu kiisalu softwarenik atuisinnaanermut uppernarsaat, aviisit atuakkallu eqqarsaatigalugit.

Pisariinnerusussaq pillugu allaffinni qarasaasiat, qarasaasiat angallattakkat aammalu printerit attaveqaammut atasut Inatsisartunut ilaasortanit ataasiakkaanit atorneqartartut taguummut “allaffiit aamma ataatsimiittarfiit assigisaallu” ilaasutut suli isigineqarput. Tamatumunnga pissutaavoq Inatsisartunut ilaasortat

attaveqaammut ataatsimoorussamut atanilerneqarnerat tamatumalu nassatarisaanik ingerlatsinikkut isumannaatsuuneq patajaatsuunerlu inatsisartutigoortumik sulinerlut tamarmiusumut pitsaaqutaasutut nalilerneqarmat, taamaattumillu IT-mut sulisunik aningaasanillu annertuunik ingerlaavartumik atuinngikkaluarluni atortorissaarutinik assigiissaakkanik aammalu atortunut antivirusiliilluni qulakkeerinnittariaqarneq pisariaqarpoq. Taamaalillunilu Inatsisartunut ilaasortat qarasaasiaannut nalinginnaasunut aammalu attaveqaatinut atasunik printeriitut ikiorsiinerlut aningaasartuutit Inatsisartut allaffeqarfiat aqqutigalugu akilerneqarnerat ingerlaannassaaq. Atortut atornerneqarnerannut ilitsersuutinik assersuutigalugulu atornerluinnermi taakkununga atuinermut killilersuuteqarsinnaanermik aalajangersaasinnaanissamut Inatsisartut allaffeqarfiata periarfissaqarnera ingerlaannassaaq.

Inatsisartunut ilaasortat partiillu allaffeqarfiini sulisut Namminersorlutik Oqartussat qarasaasiakkut ataatsimoorullugu attaveqaataannut atanilerneqarpata pissutsit immikkut ittut atuutilersarput. Attaveqarnermi aaqqiissutinik assigiissakkanik aammalu qarasaasianut ataatsimoorullugit attaveqaatinut atanilikkanut isumannaallisatinik immikkut ittunik Namminersorlutik Oqartussat ingerlatsipput. Taamaalillunilu softwarenut attaveqaatinullu aalajangersimasunut aaqqiissutit assigiissakkat pigineqassapput, soorlu aqutseriaatsit, isumannaallisaneermut programmit, mail (qarasaasiakkut allaqatiginnissut), sulianik ingerlatsisarneermi aqutseriaaseq allaffinnilu softwaret allat. Aaqqiissutit assigiissakkat taakku partiinit toqqarneqarpata allaffinni attaveqaatinut ilaasutut isigalugu atortulersuutinik softwarenillu ikkussuinerlut, aserfallatsaaliinerlut allatigullu ikiorsiinerlut allaffeqarfik akeqanngitsumik ikiuussinnaavoq. Aaqqiissutinullu assigiissagaanngitsunut akeqanngitsumik sullissisoqarsinnaassanngilaq.

Inatsisartunut ilaasortat partiillu allatseqarfiisa atugassaattut kopeerivinnik ataatsimoorussanik partiit torsuusaanni ullumikkut peqarpoq. Inatsisissatut siunnersuut naapertorlugu kopeeriviit taakku ingerlatsivigineqarnerat Inatsisartut allaffeqarfiannit isumagineqarunnaassaaq, tassungalu ilaapput printerit qalipaaitassaannut kopeerinermilu pappilianut aningaasartuutit. Tamatuma kingorna kopeeriviit ingerlanneqarnerannut aningaasartuutit partiinut naalackersuinermik suliaqartunut nuunneqassapput. Partiit namminneq naliliinertik pisariaqartitsinertillu naapertorlugu kopeeriviit ingerlanneqarnerat ikiorserneqarnissarlu pillugit suleqatigiinnisamik Inatsisartut allaffeqarfiannik nioqquteqartartumilluunniit avataaneersumik isumaqatigiissuteqarsinnaapput. Qarasaasiatigut attaveqarnermik agguaassisarneermillu atuilernerq pissutigalugu kopeeriviit pingaaruteqassusiat ukiuni aggersuni annikilliarthussasoq naatsorsuutigineqarpoq.

Aalajangersagaq partiit Inatsisartunulluunniit ilaasortat sullississutinik pissarsinissamut inatsisitigut nutaamik piumasaqaateqarsinnaanerannik piginnaatsitsinngilaq.

Nr. 2-mut 3-mullu.

Partiinut, katusseqatigiinnut kisimiillutillu qinigaasunut tunngaviusumik tapiissutit 350.000 kr.-inik aammalu qinigaasunut ataasiakkaanut tapiissutit 45.000 kr.-inik aalajangersakkakut qaffanneqarput. Inatsimmik allannguinnikkut partiinut aningaasartuutaanerussutaalersut taarsiissuteqartinniarlugit qaffaaneq pivooq, tak. inatsisissatut siunnersuummut nalinginnaasumik nassuiaatit.

Nr. 4-mut.

Aalajangersagaq nutaajuvoq. Aningaasat maanna Inatsisartut allaffeqarfiannit partiinut nuunneqartussatut siunnersuutigineqartut atorneqarnerat pillugu Nunatta Karsia aammalu Inatsisartut ukiumoortumik nalunaarusiaat aqutugalugit manna tikillugu tamat paasisaqarsinnaasarsimapput. Partiilli naalakkersuineramik suliaqartut aningaasaqarnerannik tamat manna tikillugu paasisaqarsinnaasarsimangillat. Taamaalillunilu nuussinikkut tamat paasisaqarsinnaanerata maannamut sanilliullugu annikilleriarsinnaanera aarlequtigineqarsinnaavoq. Tamanna naapertuutinngitsutut isigineqarpoq. Ajornartorsiut taanna pinngitsoortikkumallugu aningaasatigut tapiissutit tunniunneqartut atorneqarnerat pillugu naatsorsuutinik nassiunneqartunik Inatsisartut Siulittaasoqarfiata tamanut saqqummiussinissamik peqquneqarnissaa aalajangersakkami matumani siunnersuutigineqarpoq. Taamaalilluni partiip ukiumut naatsorsuutaanik tamarmiusunik nassiussinissaq partiimit toqqarneqarpat, taakku tamanut saqqummiunneqassapput. Naatsorsuutilli pisortanit tapiissutigineqartunut tunngasuinnarnik imallit partiip nassiussinavaai. Tamanut saqqummiussineq assersuutigalugu Inatsisartut nittartagaatigut pisinnaavoq.

Nr. 5, 6 aamma 7-imut

Allannguinnikkut Inatsisartut inatsisaanni oqaatsit atorneqartut Kalaallit Nunaanni Namminersorneq pillugu inatsimmi nr. 473-imi, 12. juni 2009-meersumi oqaatsinut atorneqartunut naapertuuttunngortinneqarput.

#### *§ 2-mut*

Inatsisip 1. januar 2010-mi atortuulernissaa siunnersuutigineqarpoq, tassa aningaasat ukiuata aggersup aallartinnerani.